

Cart Co' Mque' Pab Ye's Loo Mèn Co' Ngo Ban Le'n Ciuda Efes

**Pab ngue que' ye's loo mèn co'
ngola's loo Crist no loo cón che'n
Crist, mèn co' mqueltàa loo cón
che'n Diox le'n ciuda Efes.**

1 Daa, Pab, ndxe' di's che'n Jesucrist xal nee lezo' Diox. Ngue que'en ye's loo gu' co' nac mèn ciuda Efes, gu' co' ngro xà' loo cón che'n xab izlyo' par ngòc gu' che'npe' Diox. Ngola's gu' loo Crist Jesús, ne. ²Ndlyazen le' Diox tolo li anggàc con' ndac loo gu'. No ndlyazen le' gu' cue nagàl lezo' loo Diox no loo Jesucrist. No ndlyazen cue ban gu' rye nda gu' no rye ndye'th gu' làth xtàa gu'.

**Pab ndyoodi's cón che'n
con' ndac co' ndxàc loo mèn
por cón che'n Tad Crist.**

³Li na' le' mèn gab nac Diox Diox roo no Diox xèn no Diox natú' thidtene, Diox co' nac xud Tad Jesucrist na'. Por thidte ndxàc na' no thidte nqueltàa na' loo cón che'n Crist, Diox anze'f thib con' ndac angmbli loo na' no rye loothe con' co' nac con' ndac. Con' natú' co' nac che'n bé' nac che'npe' na', ne. ⁴Diox mcuri na' por cón che'n Crist ndoore' cuec Diox izlyo'. Tataa mbli Diox par gac na' mèn co' ngro xà' loo cón che'n xab izlyo', no mèn co' ngòc che'npe' Diox, no mèn co' ne'tolode cua'n xquin, no mèn co' ne'tolode gáp

xtol loo Diox. ⁵Mcuri Diox na' xalque' mnibe' Diox lezo' Diox no xal gunee lezo' Diox par ngòc na' xin'pe' yub Diox por cón che'n Jesucrist. Tataa mbli Diox tac anze'f nque' lezo' Diox ñèe Diox na'.

⁶Por cón che'n con' co' angmbli Diox loo na'a, li na' le' mèn gab di's guryath no di's guryèn cón che'n Diox loo Diox no loo mèn. Diox mbli angngòc con' ndac ndxè' loo na' por thidte nqueltàa na' loo Crist no loo cón che'n Crist, Crist co' nac lezo' no ngudloo Diox.

⁷Por tant nque' lezo' Diox ñèe Diox na', mbli Diox par le'le' Crist mtelá' na' loo con' ryes por cón che'n renpe' Crist co'se' mquée yalguth loo Crist, co' nee di's, mton' Diox xtol na' por cón che'n con' co' ngòc loo Crist. ⁸Tataa mbli Diox par mblu' Diox le' Diox nque' lezo' ñèe Diox mèn axta plóthe, co' nee di's, co'se' ndli Diox par ndxác mèn no co'se' ndli Diox ndxòn mèn co' huen huen cón che'n Diox. ⁹No mbli Diox par mblu' Diox cón che'n con' ndlya's Diox li Diox co' nac con' co' be' nzo casloo loo Diox no co' nac co' mblo xnee Diox lique' Diox yiloo, con' co' gàcque'. ¹⁰No com le' Diox mblobe'le' lezo' lique' Diox par sin falt gàcque' no tyubque' di's co'se' zinpe' huiz li Diox par thidte ñibe' Crist loo rryete con', que naca con' co' nzo loo bé', que naca con' co' nziri' loo izlyo'.

¹¹No par mbli Diox thidte mqueltàa na' loo cón che'n Diox, mcuri Diox na'

más póla par càaya' na' con' co' gac che'npe' na' yiloa, con' co' ta' Diox par càaya' na'. No ryete con' co' li Diox thidte nac xalque' mblobe' Diox no mblo xnee Diox lezo' Diox li Diox con'a tac Diox ndli ryete con' xal gunee lezo' Diox li Diox. ¹²Tataa mbli Diox loo na' par de que, nu' co' nac nerleque' mèn co' ndxàp yalxla's loo Crist, cue ban nu' par li nu' le' lèe Diox gac thib con' guryath no thib con' guryèn por cón che'n con' roo con' xèn co' nzo la's nii Diox no co' nzo la's ya' Diox. ¹³Gu' ne, co'se' mbìn gu' cón che'n di's ndac co' nac licque', di's ndac co' ndlu' xá mod lyá' mèn loo con' ryes, gu' ngola'sque' loo Crist no loo cón che'n Crist. No thidte ngòc gu' loo cón che'n Crist no ngòc gu' che'npe' Diox por ngulàa Xpii Natú' loo gu'. Ngulàa Xpii Natú' loo gu' no mbyan' Xpii Natú' loo gu' xal thib señ co' nda' cuent le' gu' nac che'npe' Diox. ¹⁴Xpii Natú' nac xal thib prend co' ngue ten na'. Xpii Natú' ndlu' loo na' nac na' che'npe' Diox axta co'se' zin huiz co'se' gac che'n na' con' co' angta' Diox càa na' co'se' ngolo gunèe Diox mdyalle' mèn co' mdyal ngòc loo cón che'n Diox, mèn co' gac che'npe' Diox, par tolo gac con' guryath no con' guryèn loo Diox por cón che'n con' roo con' xèn co' nzo la's ya' Diox no co' nzo la's nii Diox.

**Pab ngue na'b loo Diox par li
Diox tolo gac mèn co' ngola's loo
Crist no loo cón che'n Crist.**

¹⁵Por cona, co'se' mbìnlen xá mod ndxela's gu' loo Tad Jesús no xá mod nque' lezo' gu' ñee gu' ryete mèn co' ngro xà' loo cón che'n xab izlyo', mèn co' ngòc che'npe' Diox, ¹⁶indxathlasten mbezen Diox quix Diox loo Diox cón che'n gu' co'se' nte' lezon gu' co'se' mbezen Diox. ¹⁷Ña'ben loo Diox le' Diox xud Tad Jesucrist na', Diox co' nquée xnii tìn', tolo li le' gu' tolo gac

tìn' cón che'n Diox. Mbezen Diox le' Diox li par tolo tyub xnii yéc gu' no par tolo tyub xnii lezo' gu' loo cón che'n Diox láth ngue té'th gu' cón che'n Diox. ¹⁸Ña'ben loo Diox le' Diox li par tyub xnii yéc gu' no par tyub xnii lezo' gu' loo cón che'n Diox par ñee gu' no par non gu' cón che'n con' co' yan' no gu' yiloa, co' nac co' nzi quee lezo' gu', tac ndxela's gu' loo Diox xal mblya's Diox. Ña'ben loo Diox le' gu' ñee no non gu' cón che'n con' roo con' xèn tìn' co' mtan' Diox loo mèn co' ngro xà' loo cón che'n xab izlyo', mèn co' ngòc che'npe' Diox. ¹⁹Ña'ben loo Diox le' Diox li le' gu' ñee no non gu' rye loothe con' co' nac con' roo con' xèn co' nzo la's nii Diox no co' nzo la's ya' Diox co' ndli Diox loo ryete na' co' ndxela's. Ryete con' ndxè' nzo la's nii Diox no la's ya' Diox. ²⁰Co'se' mbli Diox ngro xban Crist làth mèn nguth, mbli Diox mdub Crist cuat Diox loo bé'. ²¹Ngoloa, mdoo Diox Crist loo ryethe co' nde'f di's ñibe', que naca leque yub angl, que naca xpii ye'rsin' co' ñibe' loo izlyo' ndxè', par ñibe' Crist loo angl no loo xpii ye'rsin'a xal ñibe' chol gobiern loo mèn. Mdoe Diox Crist loo ryete mèn co' ñibe', no loo ryete mèn co' ndxàp con' la's nii no la's ya', no loo mèn co' nac gobiern, no loo ryete mèn guryath no mèn guryèn co' nxo'f zin' zin' roo. Iante loo mèn co' nziri' le'n tiemp ndxè' ñibe' Crist. Ndxle'leque', ñibe' Crist loo mèn le'n tiemp co' nde nque ndxè', ne. ²²Mbli Diox ngòc nado' rye loothe con' loo Crist co'se' mblec Diox rye loothe con' la's nii Crist no la's ya' Crist par ñibe' Crist loo ryethe con'a. Mnibe' Diox loo Jesús par gac Jesús xa' co' ñibe' loo ryethe mèn co' ndxela's loo Jesús, mèn co' nqueltàa loo cón che'n Diox chol lugar. ²³Sya, mèn co' ndxela's loo Crist Jesús co' nac mèn co' nqueltàa loo cón che'n Diox, mèn na' nac xal nac bé'lyòo lad mèn co' ñibe' yéc mèn, co' nee di's,

Crist nac xa' co' ñibe' loo mènà. Mèn co' nac mèn co' ndxela's loo Crist, mènà ngue li par tolo tyaa no tolo tyubque' di's cón che'n con' roo con' xèn che'n Crist loo Crist. Leque Crist nac xa' co' ñibe' loo ryethe con'.

Di's ndxè' ndlu' anze'f nque' lezo' Diox ñèe Diox mèn. Por cona, mbli Diox lyá' mèn loo con' ryes.

2 Crist mbli yòo ban no gu' Diox thidtene yiloo, gu' co' ngòc xal mèn nguth loo cón che'n Diox, co' nee di's, ncu'a'n gu' xquin gu' no xtol gu' ndoore' yila's gu' loo Crist, ²co'se' mque tee ban li gu' ryethe con' co' nac mod co' nac che'n mèn loo izylo'. No mbli gu' con' co' nac co' gunee lezo' Mebizya, co' nac thib xpíi co' naban loo mbii no co' ñibe' loo mèn loo izylo'. No ndli Mebizya par angndye'th lezo' mèn par ne'tyubdi'ste mèn loo Diox. ³Làth mènà mque tee ban ryete na' póla. Mbli na'i xal ngro' mblyen' lezo' na'. Mbli na' con' ye'rsin' xal gunee lezo' na' xal mnibe' xtùuz na' loo na'. Ale ngòc na' xalque' mèn co' ndli cón che'n co' nac xab izylo'. Por cona, mzyalque' na'i ngocloo Diox loo na' par tetii Diox na' axta plóthe xalque' ndxecloo Diox loo taamas mèn co'se' tub rez Diox cón che'n mènà yiloo. ⁴Anze'f ndlyat tìn' lezo' Diox ñèe Diox mèn. Mastale' ngocloo Diox loo na' póla, ale ndxe'leque', nque' lezo' Diox ñèe Diox na' nalle'. ⁵Per mastale' ngòc na' mèn co' mque tee ban xal mèn co' nguth loo cón che'n Diox tac mcua'n na' xquin na' no xtol na', Diox mda' yalnaban cub loo na' par ban no na' Crist. Por angmbli Diox con'a loo na', mblyá' na' loo con' ryes. ⁶Por cón che'n Crist, Diox mbli le' na' ngue no yalnaban cub xal mda' Diox yalnaban cub loo Crist co'se' ngro xban Crist. Diox ngue li con' guryath no con' guryèn loo na' trè' xal ngue li Diox con' guryath no con' guryèn loo

Crist co' ndub loo bé'. ⁷Tataa mbli Diox par lu' Diox loo mèn loo tiemp co' nde nque cón che'n con' ndac co' nac anxle' co' li Diox anggàc loo mèn co'se' tolo li Diox con' ndac loo na' por cón che'n Crist Jesús. ⁸Diox mtelá' gu' loo con' ryes co'se' ngola's gu' loo Crist. Diox mbli angngòc con' ndaca loo gu'. Con'a inacte cón che'npe' gu'. Ndxle'leque', naca con' ndac co' angmbli Diox loo gu'. ⁹Ne' ne' ngli gu' ndxep con' ndac par mtelá' Diox gu' loo con' ryes. Tac chele' gu' tataa ngli, nde's gu' no ngxal' gu'. ¹⁰Diox mbli le' na' nacle' mèn cub por cón che'n Crist Jesús par xo'f zin' na' zin' ndac. Mbli nab Diox zin'a par que tee li na' zin'a.

Di's ndxè' ndlu' loo mèn xá mod cue nagàl lezo' mèn loo Diox no xá mod cue mèn rye nda mèn no rye ndye'th mèn làth xtàa mèn por cón che'n Tad Crist.

¹¹Por cona, fte' lezo' gu' xá mod mque tee ban gu' ndoore' yila's gu' loo Crist no loo cón che'n Crist. Ne'ngàcte gu' mèn bin mèn nación Israel co' ndli circuncidar xtàa. Por cona, mbez mèn nación Israel nac mèn nación Israel mèn co' ndxela's loo yalndxela's che'n circuncisión. Le' loo gu' na, mbez mèn nación Israel inacte gu' mèn co' ndxela's loo yalndxela's che'n circuncisión xal ndxela's mènà. ¹²Thib cua'a, gu', ne, ne'nque tee bante loo cón che'n Crist. Tith tith mque tee ban gu' loo cón che'n mèn nación Israel. Ngòc gu' mèn co' inda'de cuent cón che'n conveñ che'n Diox co' mbli' Diox loo mèn nación Israel, con' co' mcàbgòn Diox li Diox loo na'. Ne' ne' ngàc gu' mèn co' mbe quee lezo' loo Diox. Ndxle'leque', mque tee xà' gu' loo Diox loo izylo'. ¹³Per gu' co' tith tith mque tee ban loo cón che'n Diox thib cua'a, Diox mbli le' gu' nzi tee ban gax loo Diox nalle' por cón che'n

renpe' Crist. Nalle' nac na' che'npe' Crist. ¹⁴Crist ndli nagàl yo lezo' na' loo Diox no cue ban na' rye nda na' no rye ndye'th na' làth xtàa na'. Leque Crist mbli par thidte ngòc xtùuz na' no lezo' na', na' co' nac mèn naciòn Israel no na' co' inacte mèn naciòn Israel. Xal mteche mèn thib ftoò co' ntau' loo mèn, Diox mteche ryete con' co' ngòc xèn no xyàn le'n lezo' mèn naciòn Israel ñèè mèn naciòn Israel mèn co' inacte mèn naciòn Israel. Tataa mbli Diox par mbyu' mbyàlle' lezo' ryete mèna loo cón che'n Diox. ¹⁵Co'se' mque' mèna Crist loo cruz, leque hora mton' Crist yalgyoo no ngolo ngola's co' nac che'n ley co' mxo'f Moisés loo mèn co' mnibe' loo mèna no che'n xley' co' mnibe' loo mèna. No mbli Crist thidte ngòc ryop ned mèna, co' nee di's, ngòc mèna xal thib con' cub loo Crist. Tataa mbli Diox par mbyu' mbyàl lezo' ryop ned mèna. ¹⁶Tataa mod mbyu' mbyàl lezo' ryop ned mèna loo Diox por cón che'n con' co' ngòc loo Crist loo cruz. Tataa mod mbli Diox par ngòp ryop ned mèna thidte xtùuz no thidte lezo', co' nee di's, ngòc mèna thib nedte mèn xal nac lad mèn thidte con'. ¹⁷Mbi'th lu' Crist di's co' nac di's ndac loo gu' par cue ban gu' rye nda gu' no rye ndye'th gu', gu' co' ngure ban tith loo Diox thib cua'a no loo mèn naciòn Israel co' más gax ngure loo cón che'n Diox thib cua'a. ¹⁸Por cón che'n ryethe con' co' ngòc loo Crist, ngue no thib na' no tedib na' mod par bii gax na', na' co' ngòc ryop ned mèna, loo Diox xud na' por cón che'n thidte Xpii Natú' che'n xud na' Diox. ¹⁹Tataa mod inacte gu' mèn tith. Ne' ne' inac gu' xal mèn co' nzi tee chol làaz mèn. Ndxè'leque', nac gu' mèn gulàaz con mèn co' ngro xà' loo cón che'n xab izlyo', mèn co' ngòc che'npe' Diox. Nac gu' mèn guliz che'npe' Diox. ²⁰Nac gu' mèn co' mbryoo mxyèn loo di's ndac che'n Crist co' mbli' myen' xin' mté'th

Crist co' mtel' Crist no mèn co' mde'th di's co' ndxab Diox loo gu'. Leque yub Jesucrist nac cón che'n con' ndxè' xal thib quèe scuadr co' ndyub squin ftoò liz mèn. ²¹Por cón che'n Crist co' nac xal quèe squadra, ryete na' co' ndxela's loo Crist, nac na' xal thib yòocal co' ngue xít té'f ndac mèn, co' nee di's, nac na' xal thib liz Diox natú' loo Tad Crist. ²²Por cón che'n Crist, gu' nzi roo nzi xèn loo Diox xal thib yòocal co' ngue xít té'f mèn par gac gu' xal thib lizpe' Diox co'te' yòo ban Xpii che'n Diox co' nac yub Diox.

Pab ngue lu' loo mèn le' Diox mxo'f zin' cón che'n di's ndac loo Pab par lu' Pab no te'th Pab cón che'n di's ndac ndxè' loo alux mèn co' inacte mèn naciòn Israel.

3 Por cón che'n Jesucrist no por cón che'n di's ndac co' ngon yalban loo gu' mèn Efes, gu' co' inacte mèn naciòn Israel, daa, Pab ngue lezi'f. Mbezen Diox cón che'n gu' par gac con' ndac loo gu'. ²Naquin le' gu' non le' por nac Diox thib Diox ndac, mtan' Diox di's loon no mxo'f zin' Diox thib zin' loon. Pues zin' co' mxo'f zin' Diox loon ndxè' nac le' daa go yalbàn cón che'n di's ndac loo gu'. ³Hui' gu' nexa. Diox mxo'f loo cón che'n Diox co' nzo casloo loo Diox loon no mbli' Diox cón che'n Diox loon co' nac di's co' xax xax ngue tan cuent loo gu' loo cart ndxè'. ⁴Láth ngue lab gu' cart ndxè' co'te' mtlon mque'en ye's no axta trè', ta' gu' cuent co' huenleque' le' daa naneequé' no ndxác daa ndan cuent cón che'n Crist co' nzo casloo loo mèn. ⁵Cón che'n Crist co' ngo casloo póla, loe'nda'de Diox lugar ngro xo'fa loo mèn póla xal mxyo'f looi loo mèn nalle'. Per le'n tiemp ndxè' mxo'f loo Xpii Natú' che'n Diox con'a loo mèn co' ngro xà' loo cón che'n xab izlyo', mèn co' mtel' Diox, mèn co' ndxe' di's cón che'n Crist no

mèn co' mde'th di's co' ndxab Diox.
⁶Con' ndxè' nac co' mcasloo Diox loo mèn ndoore': Le' mèn co' inacte mèn nación Israel thidte nac con mèn nación Israel loo Crist no loo cón che'n Crist. Càaya'que' mèn co' inacte mèn nación Israel con' co' mcàbgòn Diox ta' la's Diox par càa mèn nación Israel por cón che'n Crist xal ndlu' di's ndac loo na'. ⁷Mastale' indxàalte daa ñibe' Diox loon, Diox mdoo daa loo zin' ndxè' par gon yalbàn cón che'n Diox. Por cón che'n thib con' co' mbli Diox co' ngòc con' roo con' xèn co' angmbli Diox ngòc loon co'se' mnibe' Diox loon, lin zin' ndxè'. ⁸Daa, Pab, ndyaquen nac daa thib mbi' co' yende cón ntac làth rye mèn co' ngro xà' loo cón che'n xab izlyo', mèn co' ngòc che'npe' Diox. Ale le'le' loon angmbli Diox con' ndxè' par ga lu'en no par ga tethen cón che'n di's ndac loo mèn co' inacte mèn nación Israel. Mnibe' Diox loon ga lu'en loo mèn cón che'n ryethe con' ndac tín' co' ndli Crist loo mèn, co' nee di's, nec thib mod no nec tedib mod ne'ta'de mèn cuent cón che'n ryethe con' ndac co' ndli Crist loo mèn. ⁹Diox co' mtocua' ryethe con' co' nzi loo izlyo', Diox mxo'f zin' zin' loon. No ndoo Diox daa loo mèn par lu'en loo ryete mèn ryete con' co' nac cón che'n Crist. Nalle' ngue go xo'f Diox xtùuz co' mbli Diox xtùuz cón che'n ryop ned mèn, mèn co' nac mèn nación Israel no mèn co' inacte mèn nación Israel, cón che'n con' co' ngo casloo loo Diox axta pólle'a.
¹⁰Tataa mbli Diox por cón che'n mèn co' ndxela's par lu' Diox ryethe con' co' ndxác Diox loo angl co' nzo loo bé'. Angla ndxàp con' la's nii angl no la's ya' angl par non angl le' Diox ndxác li rye loothe con'. ¹¹Diox mbli con' ndxè' loo Crist xalque' mblo xnee Diox no mblobe' lezo' Diox ndoore' cuec Diox chol con' co' mtocua' Diox par ngòca loo Tad Crist Jesús na' xalque' gunee lezo' Diox.

¹²Por cón che'n Crist, yende cón cuec ca' loo na'. Con dibaxla's yòo na' loo cón che'n Diox tac ndxela's na' loo Crist.
¹³Por cona, ngue niin loo gu' loo cart ndxè' no ña'ben loo gu': Ne'tyoo xà'de lezo' gu' por cón che'n yalndyub ngu's co' ndxác loon. Tac por cón che'n con' co' ndxác loon ndxè', le'i ndxác loon par gac con' guryath no con' guryèn loo gu' par nedrè'.

**Di's ndxè' ngue lu' loo mèn
 xá mod susque' nque' lezo'
 Crist ñèe Crist mèn.**

¹⁴Por cón che'n con' co' ndxác loon ndxè', ndyub xiben loo Diox co' nac xud Tad Jesucrist na' par mbezen Diox.
¹⁵Dioxa mda' lèe loo ryete nación, no famil, no loo ryethe con' co' nzo loo bé', no loo ryethe con' co' nziri' loo izlyo'. ¹⁶Mbezen Diox por cón che'n ryethe con' roo con' xèn che'n Diox le' Diox li con' loo gu' par gac gu' mèn co' ndxòo valor tín' loo por cón che'n Xpii Natú' che'n Diox. ¹⁷Crist nzo ban le'n lezo' gu' no le'n xtùuz gu' tac ndxela's gu' loo Crist. Por cona, mbezen Diox le' gu' thidtene li nèe lezo' gu' no xtùuz gu' par gac gu' mèn co' anze'f nque' lezo' Diox. ¹⁸Le' sya, gac gu' mèn co' ta' cuent no mèn co' ndxòn con ryete mèn co' ngro xà' loo cón che'n xab izlyo', mèn co' ngòc che'npe' Diox, par ñee gu' no ta' gu' cuent susque' arid nque' lezo' Crist ñèe Crist alux mèn loo izlyo'.
¹⁹Mbezen Diox le' gu' ta' cuent no ñee gu' xal nac mod roo mod xèn co' anze'f nque' lezo' Crist ñèe Crist mèn. Mod co' nque' lezo' Crist ñèe Crist na', axta ne' ne' inda' mèn cuent cón che'n moda. Mbezen Diox tolo gac gu' mèn ndac xalque' nac Diox Diox ndac.

²⁰No nalle', gab na' Diox roo Diox xèn nac Diox tac ante Diox ndxàp con' la's nii Diox no la's ya' Diox par li Diox gac ryethe con' co' ña'b na' no co' ndli na' xtùuz. Gàca loo na' por cón che'n

con' co' nzo la's nii Diox no la's ya' Diox co' ndli Diox zin' loo na'. ²¹Ndlyazen le' loo Tad Diox gac con' roo no con' xèn por cón che'n mèn co' ndxela's, mèn co' nqueltàa loo Diox chol lugar, no por cón che'n Crist Jesús, ne. Gàca le'n lín' co' ntlo, no le'n lín' co' ndxeloo, no le'n lín' co' ne'lith node. Taandxè' gàca.

Di's ndxè' ndlu' xá mod thidte ndxác mèn co' ndxela's loo Crist por cón che'n Xpii Natú'.

4 Daa Pab co' ngue lezilf por cón che'n Tad Crist, ña'ben loo gu': Fque tee ban gu' xal ndxàal li mèn, mèn co' Diox mblec loo cón che'n Diox xalque' mcui Diox gu'. ²Gòc gu' mèn nado' co' indye'ste. Fque' lezo' gu' gunèe gu' hues xtàa gu'. Gòc gu' mèn co' ncha'la's. No gòp gu' mod con mèn co' nac hues xtàa gu' xalque' mèn co' nque' lezo' ñee hues xtàa mèn. ³Bli gu' fuerz par thidte que tee ban gu' xal ñibe' Xpii Natú' che'n Diox loo gu'. Fque tee ban gu' rye nda gu' no rye ndye'th gu' no par thidte gac gu' loo Diox. ⁴Tac mèn co' ndxela's loo Crist no loo cón che'n Crist, mèn thidte ngòc loo Diox xal thidte ladpe' Crist. Thidte Xpii Natú' che'npe' Diox nzo. Lomisque' ne, loo thidte con' nzi quee lezo' na', con' co' li Diox loo na', co' nee di's, con' co' mbli nable' Diox gac loo na' yiloo. ⁵Thidte Tad Diox nzo. Thidte yalndxela's nzo. Thidte bautism nzo. ⁶Lomisque', nzo thidte Diox co' nac xud na' co' ñibe' loo alux con' co' nziri'. Ndli Diox zin' loo ryethe con'a. Nzoque' Diox le'n lezo' ryete na', ne. ⁷Mbli Diox loo thib thib na' ndxác na' li na' con' xal ndlya's Diox gac na' par ta' na' cuent loo xtàa na' cón che'n di's ndac xal mblya's Crist. ⁸Por cona, mbez loo libr co' nac xti's Diox cón che'n Crist:

Co'se' mquée Crist gáp loo bé', mbe' Crist thib baan mèn co' ngòc xal

pres. No angmda'la's Crist con' ndac loo mèn.

⁹¿Cón nee di's nguáp Crist loo bé', à'? Con'a nee di's ner ngulàa Crist le'n thib ye'r co' anze'f na's co' nac axta xàn' le'n izlyo'. ¹⁰Crist co' ngulàa le'n izlyo', leque yub Crist nac xa' co' mquée gáp loo bé' yiloo par hui' loo Crist ryethe con' co' ñibe' Crist loo bé'. ¹¹Leque yub Crist mbli angngòc con' ndac loo mèn. Crist angmbli le' ndxep mèn ngòc mèn co' mtel' Crist, co' ndxe' di's cón che'n Crist. Angmbli Crist le' taamas mèn ngòc mèn co' nde'th di's co' ndxab Diox. Angmbli Crist le' taamas mèn mblo yalbàn che'n di's ndac. Angmbli Crist le' taamas mèn ngòc pastor loo mèn. Angmbli Crist le' taamas mèn ngòc maistr co' ndlu' cón che'n Crist loo mèn. ¹²Tataa mod mbli Diox le' mèn lu' loo ryete mèn co' ngro xà' loo cón che'n xab izlyo', mèn co' ngòc che'npe' Diox. Tataa mbli Diox par xo'f zin' mèn co' ngro xà' loo cón che'n xab izlyo', mèn co' ngòc che'npe' Diox, zin' co' nac rsin'pe' Diox. Mèn mxo'f zin' zin'a par tolo té'th mèn par tyubdi's ndac mèn loo Crist, co' nee di's, mèn co' nac loo Crist xal ladpe' Crist. ¹³Mèn toloque' lu' loo mèn co' ngro xà' loo cón che'n xab izlyo', mèn co' ngòc che'npe' Diox, axtaque' thidte gac na' loo yalxla's co' ndxàp na' loo Crist no axtaque' ñee na' no non na' ryethe con' cón che'n Crist co' nac xgan'pe' Diox. No tolo té'th na' cón che'n Diox par tyubdi's na' loo cón che'n Crist axtaque' gac na' mèn co' nac xalque' nac Crist. ¹⁴Chele'i taandxè' mod ndxác loo na', ne'gàcte na' xal myen' bix co' ndli xtúuz chol con'. Ne' ne' gac na' xal yix co' ndxe' mbii pál co'te' nxyo'f mbii loo cón che'n chol xley' mèn. Ndxàca loo ndxep mèn por xquin che'n chol mèn co' mcua'n mod, par nquedii mèn mèn no nabe's ntoxcua' mèn yalgutyè' par quedii mèn mèn. ¹⁵Más huen gàca tyoodi's

na' ante con' co' nac licpe' láth tolo que' lezo' na' ñèe na' hues xtàa na'. Tolo té'th ndac na' par tolo tyubdi's ndac na' loo ryete con' che'npe' Crist co' ñibe' loo na'. Ñibe'pe' Crist loo na' xal ñibe' yé'pe' na' loo na'. ¹⁶Loo cón che'n Crist nac na', co' nee di's, nac na' xal ladpe' Crist. Lada natoxcua'. Nac lada xal thib con' co' huen natedó', co' nee di's, nayal' lada. Tac ryete lugar co'te' nayal' lad mèn nda' fuerz loo lad mèn. No thib thib lugar che'n lada ndli thib zin' co' ndlyath no loo dib lad par li lada zin'. Tataa mod, ne, lyath no na' hues xtàa na' no que' lezo' na' ñèe na' hues xtàa na' par tolo té'th na' par tyubdi's na' loo cón che'n Crist.

Pab ngue te'th no ngue lu' Pab cón che'n yalnaban cub co' ndxàc loo mèn co' ndxela's loo Crist.

¹⁷Con' ndxè' niin loo gu', tá, no tolo ñibe'en loo gu' por lèe che'n Tad: Ya ne'tolode que tee ban gu' xal taamas mèn co' indlibe'de Diox. Tac ngue que tee ban mèn xal nee lezo' mèn loo co' nac xtùuz mèn co' intacte. ¹⁸iProb mèn izlyo'! tac nacua' yéc mèn no nacua' lezo' mèn. No indxàpte mèn yalnaban co' nac yalnaban co' ndli Diox que no mèn tac anze'f naxèn mèn no anze'f nachol' mèn tac naad no nguud lezo' mèn. ¹⁹iProb mèn izlyo'! tac leque mèn mbli par mdyuhuan yob yéc mèn por inthyonte mèn. No leque mèn ngulàa loo chol con' ye'rsin' co' ndyub yo'f lezo' mèn li mèn. No axta con gust ndli mèn ryethe con' ye'rsin' no con' zab tac tataa mbly'a's mèn li mèn. ²⁰Per ndxe'leque', gu' ne'nté'thte cón che'n Crist tataa, ¿lé? ²¹Chele' gu', licque', mbìn di's cón che'n Crist, mté'thque' gu' co' nac cón che'n Crist xal nac Crist licpe' no co' nac con' licpe' co' nzo loo Crist, ¿lé? ²²Le' cón che'n mod ye'rsin' co' ngòc mod co' mque tee ban gu' thib cua'a na, blá' gu' ryete

mod gox ye'rsin' co' nac mod cap co' mquedi gu' thib cua'a loo cón che'n xab izlyo'. Loo yalnaban co' mban gu' co' ngòc co' nduhua nee lezo' gu', nac co' angnquedi mèn loo izlyo' ndxè'. ²³Per nalle' naquin gac gu' xal mèn cub loo con' co' ndli gu' xtùuz no loo con' co' nden' gu' le'n lezo' gu'. ²⁴Gòc gu' xal mèn cub loo mod co' nzi ban gu' nalle' le' gu' nac mèn cub tac Diox mbli nacque' gu' mèn cub. Por cona, fque tee ban lu' gu' loo mèn le' gu', licque', nzi tee ban lique' no nambique' nzi tee ban gu' loo Diox.

²⁵Por cona, ngue niin loo gu': Ne'toxcua'de gu' yalgutyè'. Ndxè'leque', ftoodi's thib thib gu' con hues xtàa gu' ante co' nac con' licpe' tac ryete na' thidte nac loo Crist no loo cón che'n Crist xal thidte ladpe' Crist.

²⁶Chele' gu' yecloo, ne'ta'de gu' lugar cua'n gu' xtól gu' látha. Ne' ne' co gu' xyàn lezo' gu' nen tiemp ñèe gu' hues xtàa gu'. ²⁷Ne' ne' ta' gu' lugar coby'a' Mebizya gu' thidtene.

²⁸Gu' co' mbli huan' thib cua'a, ya ne'tolode li huan' gu'. Ndxè'leque', bli gu' zin' con ya'pe' gu' co' nac zin' ndac par que no gu' con' ta' gu' anxle' loo hues xtàa gu' co' naquin con'.

²⁹Ne'tyoodi'ste gu' nec thib di's zab. Ndxè'leque', ftoodi's gu' di's ndac par tataa mod lyath no gu' hues xtàa gu' no par li nèe hues xtàa gu' lezo' hues xtàa gu' loo cón che'n Diox co'se' ndxòn hues xtàa gu' di's co' ndyoodi's gu'.

³⁰Ne'texide gu' lezo' Xpii Natú' che'n Diox. Xpii Natú' ngue ten gu' par nac gu' xal mèn co' ngue sell lad gu' par ndxàc be' gu' axta zin huiz co' gac huiz co'se', sin falt, telá' Diox na' loo ryethe con' ryes thidtene.

³¹Biiche xà' gu' loo ryethe con' co' nac xèn xyàn, no loo ryethe con' co' nac ayen di's ayen cuent co'se' ngyoo gu', no cón che'n co'se' ndxòo xyàn lezo' mèn, no ryethe con' co' nac con'

ye'rsin'. Ryethe con' ndxè' nac co' ndli ndyoo xà' lezo' gu' nìeè gu' hues xtàa gu'. ³²Ndxè'leque', gòc gu' mèn ndac co' ndlyat lezo' nìeè thib hues xtàa gu' no tedib hues xtàa gu'. Fteri'th ftecan' gu' xtol thib hues xtàa gu' no tedib hues xtàa gu' co' mbli hues xtàa gu' loo gu' xal mton' Diox xtol gu' por cón che'n Crist.

**Di's ndxè' ngue lu' cón che'n
xá mod ndxàal que tee ban
mèn co' nac xin'pe' Diox.**

5 Gu' co' nac xin'pe' Diox co' anze'f nque' lezo' Diox nìeè Diox, bli gu' con' ndac loo hues xtàa gu' xal ndli Diox con' ndac loo mèn. ²Tolo gòc gu' mèn co' nque'que' lezo' nìeè hues xtàa xalque' nque' lezo' Crist nìeè Crist na'. Crist mda' lugar loo mèn par mbeth mèn Crist. Tataa mbli Crist por cón che'n na'. Tataa mod mbli Crist co' mblyas Diox. Mdyac lezo' Diox loo cón che'n Crist co'se' nguth Crist.

³Ne'gàcte gu' xal mèn co' ncu'a'n xin' huan. Ne' ne' gac gu' mèn co' nqueli'th no co' ndxàn lezo' nìeè hues xtàa. Ne' ne' yath yèn con' ye'rsin' ndxè' làth gu'. Ndxè'leque', fque tee ban gu' xalque' ndxàal que tee ban mèn co' ngro xà' loo cón che'n xab izlyo' co' ngòc che'npe' Diox. ⁴Ne'tyoodi'ste gu' di's zab. Ne' ne' tyoodi's gu' di's co' ndyoodi's mèn naad. Ne' ne' tyoodi's gu' di's cap co' nac yalguyith co' indxàalte. Ndxè'leque', guuz gu' loo Diox: Diox quix U', Diox. ⁵Gu' nanee licpe' nac con' ndxè' tac nec thib mèn co' ncu'a'n xin' huan, nec thib mèn co' nac mèn xin' no mèn cap, nec thib mèn co' nqueli'th cón che'n hues xtàa mèn, co' nee di's, mèn co' lalque' nac xal mèn co' ndyub xib no co' ncòo' yéc no co' nsál' ya' loo mdo' no loo chol gunab, nec thib mèn ne'gac che'nte con' co' ta' Diox loo mèn co'te' ñibe' Crist no Diox. ⁶Ne'ta'de gu' lugar quedii chol mèn gu' con' di's

co' yende cón ntac tac por cón che'n ryete con' ye'rsin' ndxè' ndxecloo Diox nìeè Diox mèn co' indyubdi'ste loo Diox. ⁷Ne'queltàa node gu' mènà par li gu' xal ndli mènà.

⁸Thib cua'a ngòc gu' mèn co' nau' loo no co' nau' yéc. Per nalle' nac gu' mèn co' nduble' xnii yéc no co' nduble' xnii lezo' loo Tad Crist. Fque tee ban gu' xal mèn co' mbyà'xle' xnii yéc no co' mbyà'xle' xnii lezo', ndee gu'. ⁹Tac con' co' ndli Xpii Natú' che'n Diox loo na' ncàb ndxàc con' ndac, no con' nalì, no con' licpe' loo na'. ¹⁰Fté'th gu' li gu' ryete con' ndac co' ndxòo lezo' Tad Crist li gu'. ¹¹Ne' ne' ye'th lezo' gu' li gu' chol con' co' yende cón ntac xal ndli mèn co' alithe nzi que tee ban loo izlyo', mèn co' nau' loo no mèn co' nau' yéc. Ndxè'leque', más huen fta' gu' cuent loo mèn chó con' nac con' anxle' par non mèn cón che'n con'a. ¹²Tac ryethe con' co' xexte ndli mènà, co'se' gòn taamas mèn con' ndli mènà, ne'lyàa huente con' ndli mènà lezo' mènà. Ale thyon mènà. ¹³Per co'se' mco'xle' mèn loo hues xtàa mèn cón che'n ryete con' ye'rsin' co' ndli mènà, ya ngro xo'fla loo xnaa por mda' mènà lugar mduble' xnii yéc mènà no mduble' xnii lezo' mènà. Tac cón che'n di's ndac ndli ndryo xo'f cón che'n con' ye'rsin' co' ndli mèn loo xnaa. ¹⁴Por cona, mbez mèn póla:

Blo' gu' mcal' loo gu', gu' co' ndxàt. Goo che gu' làth mèn nguth. Crist li par tyub xnii yéc gu' no par tyub xnii lezo' gu' loo cón che'n Diox, ey.

¹⁵Anderhuen gu'. Leque gu' bla's loo gu', tá, xá mod nzi tee ban gu'. Ne'que tee bante gu' xal mèn naad no xal mèn nguud. Ndxè'leque', fque tee ban gu' xal mèn co' ndxác. ¹⁶Ne'cuedte gu' no ne'lá'de gu' par ne'tolode li gu' con' ndac co' ngue li gu' tac tiemp ndxè' nac tiemp ye'rsin'. ¹⁷Por cona, ne'gàcte gu' arid mèn naxèn. Ndxè'leque', gòc gu'

mèn co' nda' cuent no mèn co' non co' nac co' nee lezo' Tad Crist. ¹⁸Ne' ne' que tee tuuz gu' tac loo con'a ndxeza' mèn no ndlyux mèn. Ndxle'leque', gòc gu' mèn co' ta' lugar ante ñibe' Xpii Natú' loo gu' xal nee lezo' Xpii Natú'. ¹⁹Ftoodi's gu' loo thib xtàa gu' no loo tedib xtàa gu' xal ndlu' di's co' nac xti's Diox co' nac libr che'n salmos no con himn co' ndxol' ro gu' co' nac cón che'n co' ndlu' Xpii Natú' loo gu'. Gol' ro gu' con' roo no con' xèn no con' guryath no con' guryèn loo mèn cón che'n Tad Diox dib nzo yéc gu' no dib nzo lezo' gu'. ²⁰Por lèe che'n Tad Jesucrist na', tolo gab gu' Diox quix U', Tad Diox, cón che'n ryete con' loo Tad Diox xud na'.

**Di's ndxè' ngue lu' xá mod gáp
mèn mod loo mèn guliz mèn,
mèn co' ndxela's loo Crist.**

²¹Gòc gu' mèn co' ndyubdi's no mèn co' ndxòn ro thib hues xtàa gu' no ro tedib hues xtàa gu' por cón che'n Diox tac gu' ndxònque' ro Diox no ndxàp gu' mod loo Diox.

²²Mèngot, gu' co' ngue no xin' sa'l, bìn gu' ro xin' sa'lpe' gu' xal ndxòn gu' ro Tad Crist. ²³Tac xin' sa'l gu' nac gundan loo gu' xalque' nac Crist gundan co' ñibe' loo mèn co' ndxela's, mèn co' nqueltàa loo cón che'n Diox. Crist ntelá' mèn co' ndxela's loo cón che'n Diox por cón che'n Crist loo con' ryes. Mèna nac xal ladpe' Crist. ²⁴Texal naquin ndyubdi's mèn no ndxòn mèn di's che'n Crist, mèn co' ndxela's loo cón che'n Diox por cón che'n Crist, tataaguè' ne, ryete mèngot co' nac xin' sa'l ndxàal tyubdi's loo xin' sa'l co' nac sa'lbi' che'n sa'lgota loo ryete con' co' ñibe' sa'lbi' loo sa'lgot. Li sa'lgota xal ñibe' sa'lbi'i.

²⁵Lomisque', ngue niin loo gu', ne, gu' co' nac mènbi' co' nac xin' sa'l sa'lgot: Fque' lezo' gu' gunèe gu' xin' sa'lgot gu'. No bli gu' cas xin' sa'l gu' xalque'

ngue' lezo' Crist ñèe Crist ryete mèn co' ndxela's loo Crist no co' thidte nqueltàa loo cón che'n Crist. Fte' lezo' gu' le' Crist nque'que' lezo' ñèe Crist mèn axta mda' Crist lugar mquée yalguth loo Crist por cón che'n mèn co' ndxela's loo Crist. ²⁶Co'se' ngolo mbìn mèn cón che'n di's ndac no ngola's mèn di's co' nac di's ndaca, co' nee di's, ngola's mèna loo Crist, sya, ngòc bautizar mèn le'n nít. Tataa mod mtembli Crist mèna xal ntech mèn trast zab par co' xà' Crist mèn co' ndxela's co' nqueltàa loo cón che'n Diox loo cón che'n xab izlyo' par gác mèna che'npe' Diox. ²⁷Con'a mbli Crist par leque yub Crist lu' mèn co' ndxela's loo Diox por cón che'n Crist xal thib con' co' nquée xnii loo Diox por cón che'n Crist. Lya's Crist le' mèn co' ndxela's, co' ngòc loo cón che'n Diox, ne'gàpte nec thib con' co' nac con' xin' no con' cap no nec thib con' co' lal nac xal con' xin' no con' cap. Ndxle'leque', lya's Crist gác mèn co' ndxela's loo cón che'n Diox por cón che'n Crist, mèn co', licque', ngro xà' loo cón che'n xab izlyo' co' ngòc che'npe' Diox, mèn co' ngòcque' mèn nambii no mèn nali loo Diox. ²⁸Tataaguè' ne, sa'lbi' ndxàal quenap sa'lgotpe' sa'lbi' xalque' ngue lezo' sa'lbi' ñèe sa'lbi' leque ladpe' sa'lbi'. Co'se' nquenap mèn xin' sa'lgot, naca xal co'se' leque mèn ngue lezo' ñèe mèn mèn. ²⁹Yende chó mèn nzo co' alithe ndxeclooc ñèe lad no co' indyóode cón che'n ladpe' mèn, ¿lé'? Ndxle'leque', leque mèna ndli par nquenap mèna leque mèn. No nguàa leque mèn mèn. Crist, ne, nquenap mèn co' ndxela's loo Diox por cón che'n Crist. ³⁰Nac na' co' ndxela's loo Diox por cón che'n Crist loo cón che'n Crist xal ladpe' Crist, co' nee di's, co' nace' bé' ladpe' Crist no sith ladpe' Crist no ren ladpe' Crist. ³¹Por cona, ndlá' thib mbyòo xud mbyòo no xna' mbyòo par tyub no mbyòo thib mza'. Le' sya, ryop mbyòo

mza'a ngòc thidte xtàa co' mdyoo dó'.
³²Con' ndxè' nac thib con' roo no thib
 con' xèn co' nzo casloo co' tarte ryo xo'f
 loo mèn. No cón che'n con' ndxè' nac
 cón che'n Crist co' ngue toodizen loo
 gu'. Lomisque' ne, naca cón che'n mèn
 co' nqueltàa loo cón che'n Crist chol
 lugar. ³³Per thib thib gu' co' nac xin'
 sa'lbi', leque gu' quenap xin' sa'lgot gu'
 xalque' ngue lezo' gu' ñèe gu' gu'. Xin'
 sa'lgot, gòp gu' mod loo xin' sa'lbi'pe'
 co' nac sa'l sa'lgota, ne.

6 Lomisque', niin loo gu', myen', gu'
 co' nac xin' xud gu' no xin' xna'
 gu'. Ftubdi's gu' loo xud gu' no loo xna'
 gu' tac gu' nac myen' co' nzo loo cón
 che'n Crist. Nali no nambii nac con'
 ndxè' loo Diox. ²Bli gu' con' guryath no
 con' guryèn loo xud gu' no loo xna' gu'.
 Tac chele' gu' li con' ndxè' co' nac ner
 yalnibe' co' mnibe' Moisés loo mèn co'
 mcàbgòn Diox càba con' ndac loo mèn,
 cona nee di's, ³xyal' ned xyal' yó' loo
 gu' par cua'n gu' co' hua gu' no co' gu'
 gu' no tyac lezo' gu' láth ban gu' huax
 lín' loo izlyo' ndxè'. ⁴Le' gu' co' nac
 gundan ted gundan yín' loo xin' gu'
 na, ne'ta'de gu' xyàn lezo' xin' gu' par
 yecloo xin' gu' no par tyoo xà' lezo' xin'
 gu' loo mod co' ndxela's gu' loo Diox.
 Ndxle'leque', no no ftoodi's no gu' xin'
 gu' nado' di's no nado' cuent par té'th
 xin' gu' ñibe' xin' gu' loo lezo' xin' gu'
 no loo xtùuz xin' gu'. Blu' gu' xin' gu'
 par tyubdi's xin' gu' loo cón che'n Tad
 Crist, ne.

⁵Gu' co' nac moz, ne, ftubdi's gu' loo
 patrón gu' no bìn gu' ro patrón gu' co'
 ñibe' patrón loo gu' loo izlyo' ndxè'.
 Bli gu' cas patrón gu'. No gòp gu' mod
 gunèe gu' patrón gu' dib nzo yéc gu' no
 dib nzo lezo' gu' xalque' ndyubdi's gu'
 loo Crist. ⁶Ne'gàcte gu' xal moz co' ndli
 zin' ante co'se' ndoo naa patrón loo
 moz par tataa mod giin moz loo zin'.
 Ndxle'leque', gòc gu' xal moz co' nxo'f
 zin' cón che'n Crist. Bli gu' zin' dib nzo

yéc gu' no dib nzo lezo' gu' xal mèn co'
 ndyé'th lezo' loo co' ñibe' Diox. ⁷Gu'
 co' nac moz, bli gu' zin' dib nzo yéc gu'
 no dib nzo lezo' gu' xalque' ndli mèn
 sirv loo Tad Crist. Ne'lide gu' sirv loo
 xtàa gu' xal ndli chol mèn sirv loo xtàa
 mèn. ⁸Tac gu' naneeque' le' ryete con'
 ndac co' ndli thib thib na', càaya' na'
 yalndxax cón che'n con' ndac co' ndli
 na' co' ta' Tad Crist, que nac na' moz,
 que nac na' mèn co' yende chó ñibe' loo.

⁹Lomisque', gu' co' nac patrón,
 ne, tataaque' bli gu' con moz gu'.
 Ne'tetiixù'de gu' moz gu'. Fte' lezo' gu'
 le' gu' nonque' le' Tad Diox, co' nzo loo
 bé', nac patrón che'n ryete na', que nac
 na' patrón, que nac na' moz. Indlide
 Tad Diox tyu' thib mèn más leque tedib
 mèn loo Tad Diox.

**Pab ngue lu' le' xti's Diox co' nac
 di's natú' nac xal nac chol yi'f co'
 ntau' solndad lad solndad loo xó'
 loo mèn co' ndxela's loo Crist.**

¹⁰Per nalle' con' ndxè' nac lult di's
 co' ngue niin loo gu', mèn co' nac xal
 huesen por cón che'n Crist: Leque gu'
 blo valor loo gu' no bli gu' par ye'th
 lezo' gu' par tolo queltàa gu' loo Tad
 Crist no loo cón che'n Tad Crist por cón
 che'n ryethe con' co' nzo la's nii Tad
 Crist no la's ya' Tad Crist. ¹¹Fquenap
 gu' gu' loo ryethe con' ye'rsin' che'n
 Mebizya co' ngyoo no mèn. Xal co'se'
 ntau' solndad lad solndad con thib bloo
 yi'f loo con' ryes, tataaque' ndlàa Diox
 na' no ntau' Diox na' loo con' ryes no
 loo con' ye'rsin' co' ndxàc loo na'. ¹²Tac
 ingyooode na' con mèn loo izlyo' ndxè'.
 Ndxle'leque', na' ngyoo con ryete xpïi
 ye'rsin' co' nzi tee ban loo mbii. Xpii
 ye'rsin'a ndxàp con' roo con' xèn la's nii
 xpïi ye'rsin'a no la's ya' xpïi ye'rsin'a.
 Ñibe' xpïia loo izlyo' ndxè', co' nee di's,
 loo mèn co' nac jef roo jef xèn co' ñibe'
 loo mèn loo izlyo' ndxè'. ¹³Por cona,
 gure nèe gu' no blo gu' valor loo gu' loo

cón che'n ryethe con' co' nzo la's nii Diox no con' co' nzo la's ya' Diox xal thìb solndad co' ndxoc xab co' nacsua' con yìf par tau' solndad lad solndad par lyá' solndad loo con' ryes. Tataa bli gu' par ne'tyoo xà'de lezo' gu' no ne'zyebte gu' co'se' cobyá' Mebizya gu' par li Mebizya tyub yo'f lezo' gu' par li gu' con' ye'rsin' le'n huiz co' gàc huiz ye'rsin'. Le' co'se' yilo ri'th con' ye'rsin'a loo gu' na, bli gu' par tolo cue nèe gu' loo cón che'n Diox. ¹⁴Tolo bli gu' par cue nèe gu', tá, loo co' nac cón che'n Diox. No que tee ban li gu' con' co' nac licpe'. Tataa gáp gu' fuerz no yòo valor loo gu' co'se' cobyá' Mebizya gu' hora xal ndli thìb solndad co'se' ntí' solndad thìb cinch le'n solndad par gáp solndad fuerz. Bli nèe gu' gu' loo cón che'n Diox par nalì no nambìi que tee ban gu' loo cón che'n Crist par ne'lìde Mebizya gan loo gu' xal co'se' ndxoc thìb solndad xab solndad co' nacsua' con yìf par ne'tehuì'de ngolo ngola's solndad solndad co'se' ndyee solndad loo xó'. ¹⁵Nalas gure gu' no bli nab gu' gu' par ta' gu' cuent no co gu' yalbàn loo mèn cón che'n di's ndac co' li par yo nagàl lezo' mèn que tee ban mèn loo Diox. Tataa bli gu', co' nee di's, nac xal ndli solndad co'se' quej nque' solndad zapat nii solndad par yátbèe solndad ya solndad loo xó'. ¹⁶Más de cona, gola's gu' no gòp gu' yalxla's loo Diox xal ngue niin loo gu' par ne'lìde Mebizya gan loo gu'. Tataa bli gu', co' nee di's, nac xal ndli thìb solndad co'se' ntau' solndad lad solndad con thìb le' yìf co' lèe scud láth co'se' ndoo mèn co' nac ngolo ngola's che'n solndad loo solndad con flech, co' ndub quìi bèel punt, par lyá' solndad loo con' ryesa. Tataa bli gu' par ne'yizi'fte no ne'yiga'ste con' ye'rsin' loo gu' co' nac con' ndlyá's Mebizya gac loo gu'. ¹⁷Bli gu' xtùuz loo ryethe con' cón che'n xá mod mblyá' gu' loo con' ryes par quenap gu' xtùuz

gu' xal nquenap solndad yéc solndad con sombrèl co' nacsua' con yìf. Blu' gu' cón che'n xti's Diox loo xtàa gu' xal ndlyath no Xpii Natú' che'n Diox gu'. Tataa mod li gu' gan loo Mebizya xal ndli solndad us thìb cuchi par li solndad gan loo mèn co' nac ngolo ngola's che'n solndad. ¹⁸Ftoloque' gurez gu' Diox no bñab gu' ryethe con' naquin gu' loo Diox por cón che'n Xpii Natú'. Ftolo bñab gu' con' loo Diox xal mèn co' nalas nziri' co' nac mèn co' inzode mcal' loo. Ftoloque' gurez gu' Diox por cón che'n ryete mèn co' ngro xà' loo cón che'n xab izlyo' co' ngòc che'npe' Diox. ¹⁹Gurez gu' Diox por daa, ne, par tolo ta' Diox lugar loon par tyoodizen con dibaxla's no lin par yath yèn cón che'n di's ndac co' ngo casloo loo mèn axta póla. ²⁰Diox mtel' daa par ndalen xal mnibe' Diox loon par tethen cón che'n di's ndac che'n Diox loo mèn. Nalle' por mdethen cón che'n di's ndaca, mque' mèn daa lezi'f. Gurez gu' Diox par daa par yòo valor loon xal ndxàala par gon yalbàn loo mèn con dibaxla's cón che'n di's ndaca.

**Pab ngue nii Diox loo mèn
co' ndxela's loo Crist no
loo cón che'n Crist.**

²¹Tiquic co' ndxàc hues na' por cón che'n Crist, co' nac mbi' co' anze'f nque' lezo' ñèe na', Tiquic ta' cuent loo gu' par ñee gu' no ta' gu' cuent cón che'n zin' co' mxo'f zin' Diox loon no xal ndxàc ryete con' ndxè' loon. Anze'f altant ndoo Tiquic loo mèn láth nxo'f zin' Tiquic zin' loo mèn cón che'n Tad Crist. ²²Por cón che'n con' ndxè' mtel'en Tiquic loo gu' par ta' Tiquic cuent loo gu' xá nzo nu' par nedrè' no par tegán Tiquic lezo' gu'.

²³Mbezen Diox no Tad Jesucrist le' Diox li par cue gu' rye nda gu' no rye ndye'th gu'. Gòp gu' yalxla's loo Diox xud na'. Fque' lezo' gu' gunèe gu' xtàa

gu' co' nac xal huespe' gu' làth xtàa
 gu'. ²⁴Mbezen Dix le' Dix li anggàc
 con' ndac loo ryete mèn co' nque' lezo'

Tad Jesucrist na' con dib nzo yéc mèn
 no con dib nzo lezo' mèn thidtene.
 Taandxè' gàca.